

# In mais da pais

Las lingias grassas e finas dal matg 2020

DA DAVID TRUTTMANN/FMR

Ussa èsi finì cun la stancladad da primavaira, cun rusnas e lockdowns. Quest mais hai gi num prender las «hottas enta maun»! Be dai, preziadas ustieras, coiffeurs e vendiders! A la lavur!

P.ex. ils pestgaders, quels lavuran surtut ils emprims dis da matg. E tge feghers peschuns ch'els han prendì ora p.ex. al Lai da Murmarera. Peschuns uschè gronds che questa gasetta aveva fadia da stampar las fotografias sin la larghezza da la gasetta.

Il scriptur Arno Camenisch lavura mordio. El scriva e scriva e scriva. Suenter mintga cigaretta in nov cudesch. E Camenisch è probabel il sulet litterat svizzer che vegn da vender ses cudeschs sco paunets chauds perfin durant temps cun librerias serradas. Sin quest success ha Camenisch segir merità ina proxima cigaretta inclusiv ina stritgada lässiga cun il maun tras ils chavels.

Il medi d'accidents René Zellweger ha lavurà mo paucs mais sur enviern a Savognin. Per la paja ha'l procurà per in «finale furioso». Cun in'intervista fulminanta en las raits socialas ha'l mess en dumonda las mesiras da protecziun dad uffizis federals ed associaziuns da sanadad mundialas en connex cun il coronavirus. Ses patrun da lavur temporar, il Center da sanadad da Savognin, ha stuì sa distanziar da l'agen medi. Uschia èsi halt cun chirurgs d'accident – mo staglias.


Il Tribunal federal ha gi blera lavur cun il chantun Grischun quest mais, cun trais sentenzias grondas. Resumà a la svelta èn quellas sentenzias da Losanna pro-

pi da gronda «valor»: L'investur Remo Stoffel ha cumprà la Therme per in pretsch da vaglia, l'iniziativa encunter la chatscha tradiuzionala en il Grischun è valaivla, ed il rivaun cumin (Flussuferläufer) da la Ruinaulta vala dapli ch'ina senda turistica. Sche las sentenzias da Losanna valan propi adina dapli che tschintg raps, quai valessi la paina da laschar examinar dad in expert, forsa d'in valurus anteriur derschader. Dal rest: ils dus plets «lavur» e «valor» consistan dals medems bustabs!

Suenter la lavur èsi bain pli che merità da survegnir in menu da camifo. Uschia è quai il cas dapì onns era tar ils acziunaris da la Bieraria da Tschlin. Quels survegnan servì tradiziunalmain tar mintga radunanza generala ils tipics canedels, uschia ha rapportà la FMR. Perquai n'èn ils acziunaris da la bieraria atgnamain betg «shareholders», mabain «canedeholders».

Apropos menu: La Regiun Engiadina Bassa/Val Müstair ha preschentà in menu vaira salà en furma dal rendaquint. Sco ch'i para ha la regiun lavurà «grondius» l'onn passà. La regiun ha numnadamain fatg dus milliuns deficit, tar sortidas da quatter milliuns. Ils revisurs da quint vegnan segir ad avair remartgà ch'il quint saja «lev» sur il preventiv.

Baselgias èn lieus da forza, lieus d'energia. La plaiv da Trin vul lavurar cun quell'energia e planischa perquai da montar panels solars sin il tetg da la baselgia. Però atenziun – ils «anticrists» da las organisaziuns per la protecziun da la patria pudessan anc lavurar encunter.



ILLUSTRAZIUN JON BISCHOFF

Lavur e lavur l'entir mais: Il luf lavura en Surselva, il castur lavura en Engiadina Bassa, René Epp vul entschaiver a lavurar sco capo da Mustér, Seraina Ulber vul chalar a lavurar sco piragna ed Isabella Wieland ha chalà da lavurar sco «anchorwoman» dal «Telesguard».

Mo in Sursilvan, quel giauda finalmain ina stad senza stuair lavurar: Norbert Cavegn, il president dal Open air Lumnezia. Il festival è annullà, uschia ch'el po finalmain giudair ina stad senza rambazamba, senza tualettas da toi-toi e senza ina piazza da cam-

par plain merda. Quai èn bain bellas perspectivas per questa stad? La dumonda è mo: Nua ir en vacanzas?

## In mais da pais

(fmr/dat) Tgeninas èn stadas las lingias grassas e finas dal mais passà en Rumantschia, en Grischun ed insumma? Quai sa dumonda la FMR mintga fin dal mais. Tge paisa e tge paisa mo in zichel? Nus laschain repassar schabetgs, dain ina survista casuala e commentain quai cun in surrir. Mais per mais illustrescha il Bregagliot rumantsch Jon Bischoff il «Mais da pais» cun in «schurnal grafic».